

竹

巖

集

竹巖集卷十七

明詹事府少詹事兼翰林院學士莆田柯潛著

南京戶部主事四世從孫維騏校編

清邑庠生員鄉飲賓六世從孫亨

江南當塗縣知縣九世從孫潮

重校梓

誌銘

監察御史劉君世亨墓誌銘

海鹽劉君世亨天順己卯七月二十三自終於京師之寓居予哭送其柩出東門十月某日葬某鄉某山不食之原明年其同鄉友禮科給事中張靖之具事

狀持示予曰世亨有遺言必得子銘非我敢以煩子也予與君置聲利爲道義之交自聯業太學及今十四三年矣則君之銘非予所宜辭者乃爲序而銘之其序曰君姓劉名泰字世亨爲人中介外和能不以物累志讀書窮日夜寢食失期不踰年學識暴起出人上其爲詩文清俊可人間以餘力學行草書亦精好正統甲子舉鄉試乙丑戊辰兩試禮部皆不利景泰辛未始舉進士第以慎選爲翰林庶吉士讀中秘書於是志益明業益習對人論天下事無不盡而當世所謂善人君子者尤惓惓也既而拜河南道監察

御史執憲度有直聲嘗出按遼東及南畿諸郡所至
吏畏威而民懷之淮上有不法事君廉其實乃執政
所爲者即馳奏劾之卒移其任徽郡有大獄累歲不
能解君決遣於立談間無一稱寃者太平村民俗歲
殺犬賽神奸吏誣告民厲呪守守怒捕甚急民驚駭
不知所爲或自縊死君適至即置告吏于法使人遍
慰民民相率詣君謝更生歡聲滿道其明決有爲多
類此人謂君負大器不日可至通融詎意遽以疾卒
悲夫卒之時猶強支餘息諄諄作仁義語書一詩付
其侄琪曰非知我者勿示之詩有清白肯爲兒女計

疎狂曾作國家憂之句未嘗識君者誦此足以究其所存君生永樂壬寅八月十五日得年三十八其先大梁人高祖恂元海鹽教諭因家于官曾祖彥芳祖廷佐父鳳贈監察御史母某氏配某氏皆封孺人二女許嫁沈某俞某皆士族也嗚乎士既有名于世雖死可無憾矣然賢者天而不肖者久存將使人無以信其爲善此君子所以咎天予奪之昧茫而悼君之不遠到也銘曰

以君爲生耶何幽壤之下杳不聞其聲也以君爲死耶何干霄之氣尙砰砰也嗚乎君有奇才川騰海湧

君有貞操玉潔冰清此所以雖死不死卓乎爲人中
之英也

誠意齋賀處士墓誌銘

永新有賀巽者請予爲其父本誠墓銘而以其鄉人
劉昱偕來昱吾亡友編修幼顯之弟也予痛幼顯不
可復起而不辭巽之請者喜見昱如見幼顯也本誠
諱孟淳號誠意齋其先世居田東後徙城之東郭曾
大父祥卿贅居琥溪大父希文父行用世以儒名于
鄉母羅氏處士少孤年甫十四已能以直義出大父
於寃獄奉母以及其兄長撫諸弟以及其族屬之幼

者咸得宜自其祖父時積有厚貲處士能痛自損約
至鮭菜瑣細人不能堪然有義舉輒出囊金不惜也
治一室多積圖書日與兄弟講論其中未嘗輕出庭
戶或赴人之難則昏夜倒屣以行儼夫利叟見即趨
避不與言而才且賢者雖髻髻亦敬禮如上客縣官
聞其賢強起之使治錢稅公私稱平惜其所用者小
而未能究厥施也洪武戊寅七月二十二日生正統
乙丑正月初四日卒得壽四十又四初娶陳氏生一
男曰觀再娶周氏生一女適士族左魁三娶吳氏生
二男曰巽曰坤孫男三人女二墓在萃嶺某山之原

葬用卒之年二月十五日嗚乎處士性濶達有大節
居鄉多惠利及人其卒也里之人皆悲之或有哭而
出涕者是可銘也銘曰

去利取義行與日升胡嗇其壽而不使成桂植蘭芳
有賢孫子天所厚者庶幾在此

工部局副邱君邦禮配陳氏墓誌銘

孺人姓陳氏諱祥字淑慈世居延壽里涵江爲隱士
德和之女歸同里邱氏爲京局副使邦禮君之妻舅
早喪常以不逮事爲恨事姑旦暮上食飲無違意客
至具觴殽以無爲有人不知其貧治女事甚勤月積

歲儲久乃克裕性和而善教子女各就業無廢惰者
從邦禮君居官百費視官祿上下豐儉得宜又斥其
餘以貸鄉里游寓之貧者卽不能償置不問邦禮早
起趨公所抵暮始歸一切事孺人皆以勞自當不使
之知初余入京舍其家未嘗聞其出疾聲戒諸子相
禮遇甚厚始猶疑其第勉強一時乃至久能不變也
及邦禮君請老歸家事種種就緒於此可以安坐享
富樂矣而孺人猶履儉約食不累豆服飾出洗刷以
爲新人難之是知人之造家必內有佐助者之賢否
則幾何不始立而終敗哉孺人生於洪武丁丑六月

十四日卒於天順己卯八月二十三日得壽六十又
三生一男曰謨其曰諒曰讚曰誠曰譜曰謙皆側室
出二女皆適人孫男四曰忠曰憲曰泰曰恕皆幼墓
在延壽里塗山之原葬用辛巳十二月二十四日也
諒舉鄉闈有名會試辭教職卒業太學今聞計將歸
守制來求予銘銘曰

不疚其艱勤以自愁不利其亨而戒傾躓此女婦之
所難爲孺人之所易我其銘之非獨慰九泉之思將
以昭示于來世也

鄭母貞一孺人祁氏墓誌銘

去年夏蒲城東鄭東野先生以書抵潛視其緘題有
異於常驚怪失色亟讀之知母孺人祁氏沒且莫矣
乃南面哭揮淚滿襟袖尋又以書並緘孺人之行狀
來使爲銘嗚乎潛童少時從先生學孺人愛遇實隆
其於沒也宜爲銘况有先生之命乎孺人潛同里人
諱淳字淑清號貞一生於祁氏爲稼翁女嫁鄭氏爲
力以公之妻初鄭氏擇婦偃蹇十數家無可其意者
最後聞孺人自幼薰染詩禮間事絕異他女遂聘焉
既歸事老姑能喻願指姑甚愛之治家斬斬中度媪
御輩畏其嚴而懷其恩無有後言者公爲人好義舉

收疏族之單窶者畜之擇其賢者勉使讀書孺人積少累微以助其費及公以郡庠生貢入太學人謂義舉將廢孺人益勉爲之盡賣奩中物無恡惜意公卒孺人年未四十纍纍然以儉治貧左腕乳襖右手縫緝身勞而心不怨也是時先生方十歲穎敏知學孺人效古事之可資勤者無不爲既長學行有成欲取科第出與天下士馳騁當世顧孺人年已暮不可遠去遂輟志爲林下人時時從博雅者遊學益進行益修遠近宗從登門講義室內常無坐處孺人訪其飢者與食寒者與衣曰吾寧忍人以貧困廢學耶名士

往來其家無虛日爨人既治具孺人必詰問令豐潔
乃進曰客可疎薄禮耶嫁孤姪女及姪孫女二人葬
從侄及其婦之無後者二喪修先世墳墓之蔽於榛
莽者數所至凡族中廢典者皆取錢付之先生爲倡
蓋至是家稍克饒不欲以財累後人而以素風高義
遺之安也生洪武癸丑八月十八日卒天順庚辰八
月初十日得年八十八子男一曰芹門人稱爲東野
先生女四人長嫁東鹿知縣黃遜次未嫁卒次婦太
學生方公瓚次嫁宋鼎用孫男二曰習禮習樂太學
生卒曾孫男二曰鳴球鳴鶴女一墓在瀨溪石龜山

孺人在時營以葬其夫者卒之年某月某日先生奉
孺人柩合葬焉嗚乎舉婦職之常而能支傾以就安
者可尙也未可異也至於事有關於名義而學士大
夫或以爲難而不爲乃安行於房闈不亦可異哉銘
曰
石龜之山鄭母之藏邦人往來孰不指楸梧而徬徨
盖生平徽懿起人之敬仰何間存與亡也

叔母孺人何氏墓誌銘

孺人何氏莆維新里錦江人曾大父道夫號清修大
父允恭號東隱父宗樸號願正道人連世不仕以行

義重於鄉母郭氏初孺人之姊歸柯氏爲我叔父之室有賢行方逾三年卒叔父聞孺人賢如其姊復遣媒妁聘爲繼室姻屬多助爲之言久而始從及歸事我大父母承顏色教令一信而順於叔父得輔相之宜於凡內外屬人上下適其分其自奉皆薄其推以及人者無或吝其收恤孤貧子女皆厚及長又婚嫁之使不失時時人皆謂賢孝慈和必享壽考乃以天順八年九月十一日卒僅得年五十一生三男曰深曰混曰澧其一男曰瀾及二女皆側室鄭氏出也深居喪不出庭戶朝夕哭盡哀來吊者憐之且謂非孺

人之教不能然也墓在醴泉里斜山棘州坑之原葬
用卒之又明年丙戌正月十一日先期深以書來告
潛悲弗獲臨兆從事顧以所能用情者執筆爲銘文
埋于幽以長其聲而已銘曰

柔而嘉慎所履意度汪汪無愠喜宜永年宜遐祉方
陟其亨倏而止吁嗟乎天何爲爾琢辭于石昭厥美
垂千百齡無已已

亡弟雲莊處士墓誌銘

予有弟二人季曰澍字時雨姓柯氏雲莊處士其別
號也莆田縣安樂里人性敏有幹治才才可用不求

見於世以奉二親嘯玩湖山爲娛樂比數年苦於痔疾枯羸甚屢用醫竟弗能效以成化己丑九月十一日卒得年三十二其生則正統戊午六月十七日也會祖居寔祖德平號桃溪耕叟父原朴號南軒道叟封尚寶司少卿兼翰林院脩撰母戴氏封宜人配王氏子男二宗璧宗瓚女一俱幼墓去家五里許里曰醴泉地曰東汾山曰翠林丁向卒之年十二月十二日葬明年十一月始克爲銘刻于石追而納諸幽其詞短其哀長吁奈之何哉銘曰

吁嗟季弟何喪之亟傷我母懷哀恫朝夕母亦旋殂

酷禍駢仍我心如割我淚如傾翠林之峰歸汝于址
天地有窮此哀曷已

黃母陳孺人墓誌銘

妻道無成先民語常以著分也不幸而夫亡子幼於
是而能有爲爲之而能有成若黃母陳孺人者蓋處
變以復其常也豈戾先民之則哉孺人諱貞信揚之
江都瓜渚里人嫁同邑儒醫黃存禮孺人父母皆賢
自幼薰染詩禮間事絕異於他女存禮爲醫未嘗內
酬金孺人亦能以廉佐之故其惠益遠而名益彰存
禮沒孺人方盛年誓天無他志或曰生事疎薄奈何

曰烹菜攪糜足矣或曰子幼不可恃奈何曰棄子尚
不祥況其幼耶遂屏脂澤綜理家業孺勤自剪製工
巧至炊澣煩瑣之事皆躬爲之預計有無衣食頗具
他人所有不立絲髮覲幸意賙遺自己出雖貧不顧
人難之時叔祖姑史氏姑王氏俱年八十餘以有孺
人之賢而忘其老及卒殯殮葬祭惟謹不隨俗用浮
屠術遵黃氏家法也撫諸孤教與愛兼稍長每飭從
賢後者遊且令習醫以成其德次子瑠業尤精起爲
太醫院醫士高風偉誼布聞大方家人咸譽孺人之
善教也存禮季父維正由給事中遷長史卒于官孺

人遣人歸其孥居同室食同釜歡洽無間言育從子
玘恩與已子均長子琮嘗遇瀕死人于河滸乃舟人
所棄者趨告孺人亟命舁歸于家早暮飲以善藥既
愈復資遣之不問其姓名後琮之武昌有一夫拜且
泣曰吾王義也微若母吾即鬼錄久矣湖湘人迄今
旣談其事孺人有苦節終始五十年無可訾者鄉耆
老屢白郡邑上其行請 命旌其門孺人固謝曰雖
不可再恒事耳何以旌爲遂已天順己卯七月六日
以疾卒距生洪武庚申五月十八日得壽八十七子男
四長琮先卒次卽爲醫士者次珍次羽孫男十一頰

顛顛顛用頊頊頊景童秋童萱童女七曾孫男五延
康永康得康保康志康醫士君將歸守制卜以是歲
某月某日葬孺人于江西山蜀岡詣予泣請銘嗚乎
醫士君之賢予所雅重者也視子知母惡可辭銘銘
曰
禍方烈而能夷家方傾而能支職曰無成而卒任之
寔爲處變之宜也嗚乎惟其然卓乎女婦之賢斯可
以見其夫於九泉矣

張母柯孺人墓誌銘

孺人姓柯氏甫安樂里柯山人桃溪耕叟德平公之

女封尚寶司少卿兼翰林院編修原朴公妹而潛之
姑也年十八嫁同里橫渠張氏爲遵約之妻有子男
四人曰纘爲郡庠生曰統曰締曰縵女三人長適林
次適鄭次幼孫男一人曰洪猷孺人生永樂丁酉六
月十八日卒景泰癸酉十二月初六日得年三十七
以成化戊子十月某日葬某山之原柯與張皆鉅族
傳世皆有矩度孺人既嫻習家庭之訓故其嫁也舅
姑雖嚴能循其法以爲安自佩服櫛珥凡資已者常
出於儉自待賓奉祭以及歲時餽問姻隣之儀雖盡
費不以爲侈家事無巨細皆經畫有方一不以煩其

夫督教諸子使各就業締緼及幼女皆側室出也撫
之均其恩意內外屬人稱其賢並無異言其卒也皆
哭而思之前葬纘以書來謂潛宜爲銘潛臨書泫然
泣下屢執筆不能成章旣而念曰非此無以慰冥漠
之思遂強序平生大概而系以銘辭曰

孺人歿時諸子女尙幼越今十六年男有室女有歸
而幼者亦皆能自植曾不獲享其養以酬字育之勞
其可悲也夫其可悲也夫

竹巖集卷十八

明詹事府少詹事兼翰林院學士莆田柯潛著

南京戶部主事四世從孫維騏校編

清邑庠生員鄉飲賓六世從孫亨

重校梓

江南當塗縣知縣九世從孫潮

說

曹氏二子字說

嘉名美字殷以前未有也有自周始其意欲爲子者
因之傲于心以善其身故不以國不以官不以畜幣
不以隱疾必於信義而擇淑令焉後世日趨於浮靡

僭擬爲高則堯舜夔龍立奇爲異則星雲麟鳳下此
則饕慕珠玉志愈陋而名字隨之甚非古人教子意
也錢塘曹某今寓京師生二子皆穎異可教而成因
名其長曰政字尚賢名其次曰潤字尚德非所謂必
於信義而擇淑令者類耶脩撰童君大章千戶范君
叔大皆其舊契也喜其不僭擬不立奇有古之風而
又懼其弗克稱也偕來請說於予使之日儼于心予
方自儼不能有成而於二子尚何言哉請之不置則
曰昔郢相貽書於燕相誤筆舉燭二字燕相推其說
行之燕國大治夫所推之說非郢書意也而能爲燕

國之益今求有益於二子亦以燕說說之可乎天之
生賢將以爲政仕者事也人之脩德將以潤身學者
事也豈曹氏之子欲其長者仕以治人而次者學以
獨善其身哉蓋學而優則仕仕而優則學二者相資
而不離也尙賢果欲仕乎則務學可也尙德果已學
乎則出仕可也兄弟尙交勉之以無貽斯名字之慚

朱庶字志勤說

朱氏子名庶其父和卿命之也和卿卒之幾年庶年
十八其伯父士寬將爲之加冠于其首來請予字並
爲說以教之予與朱有世姻且居相隣比情義之洽

有不容辭者遂爲字之曰志勤稽諸古訓耘而不息之謂庶不息非勤乎勤於耘農之事勤於學士之事也人生天地間不爲士則爲農工商非所宜道者况爲之耶爲士而勤於學若書所謂遜志時敏則日進高明而德修矣爲農而勤於耘若左氏所謂是庶是稂則百穀用成而歲稔矣是則士農之業不同其要一皆志於勤耳若夫滅裂而學鹵莽而耘亦何能有所得哉和卿之名子以庶豈教之爲農盖欲其志於勤以務學也古者教人爲學多取譬於耕耘之事孔子曰耕也餒在其中矣孟子曰五穀種之美也苟爲

不熟不如黃稗皆喻學也庶其朝夕誦此而加勉焉
非士不爲也非聖賢之道不學也學而志於勤不迄
于成不止也此而父命名之意而予之所以教子者
若怠其志廢其學而請學耕耘吾將謝曰吾不如老
農

贊

拙菴贊

韶州教授體行先生宋魏國正獻公之裔孫見世
之巧於求進者多至債敗乃題其所居曰拙菴所
以示儆也予亦拙者喜而贊以詞曰

世方利口而我期期世方疾趨而我倭遲視珠玉以爲土芥遇虎豹以爲犬豕貧不能求去官不能驟馳人之笑我也我以爲喜人或譏我也茫無所知此先生所以自號拙菴曰天之賦我者非人所能移也若夫經不絕誦史不停披鈎章棘句迎意而解聖淵道海洞見其涯博古通今之迹大肆文章之奇然則先生之所謂拙者殆大成若缺大盈若冲而無媿於爲人師也歟

彭學士先生贊

其容春熙其神天游其介也非絕物其謙也非同流

於物無所取也抱靜虛而自得於書無不讀也欲遠
紹而旁搜長江大河其才之富良金粹玉其行之修
以正學輔 眞主以清文煥 皇猷有志乎扶世教
而厚風俗無心於矜名譽而快恩讐凝然負一時之
望隱然懷四海之憂噫是爲安成彭可齋先生吾當
於古人中求之也

考功郎中蕭元衷進士畫像贊

是惟泰和蕭考功初舉進士時之像也其神清揚其
貌和暢才以多學而克氣以善養而壯叫閭闔而呈
瑯玕瞻勛華而承天貺拜官曹司持身廉讓有知人

之明有容物之量將由是而進事業於伊呂之間抗
聲名於房杜之上使天下之人沾被其餘澤想聞其
風望然後退而休焉呼吸雲霞吟弄風月其於樂蓋
無盡藏也

深隱老人畫像贊

瑩然玉立之身湛乎秋水之神勵其操非絕俗和其
容非同塵風總雪案攻苦食貧文咀其華道嚅其真
泓涵演迤肆於外者彬彬進而明經於世隨屈而不
伸乃退而休焉曰維命之迤構深隱齋以待盡著采
薇集而獨呻廣延士類以陶以甄蓋將以施之未竟

者淑諸人以輔 主而澤民噫是所謂心在廟堂之
上而身居湖海之濱也歟

祭文

祭張姑文

維景泰五年歲次甲戌夏五月某朔客金臺姪柯潛
嚮方哀告于橫渠張舍_早亡姑之靈曰潛羈跡京華去
親舊幾五載矣方此傾仰而一段淒風忽自南來遽
覺有愴然氣無何吾姑之訃音至矣嗚乎哀哉追念
潛家食時凡骨肉之親俱保完無虞歲節聚合歡慶
於一堂之上其樂可勝道哉詎意不旋踵間沒者四

人先大母繼以吾妻又繼以吾妹又繼以吾姑仰而
哭俯而思推究速禍之由則吾家深仁厚澤奚宜有
若是之殃咎也嗚乎天其可問耶惟姑之生其性聰
慧其行慈良子焉婦焉妻焉母焉靡有不宜者夫何
天奪之早使子未有成女未有歸纍纍然早夜叫號
前孰之襟後孰之裾哉度姑於此既不能瞑目九原
潛之於姑病不及問死不及吊尤其飲恨而吞聲也
睇南山而興嗟瀝肝腑以陳詞臨紙荒迷涕泗交墮
嗚乎哀哉尚饗

祭大父桃溪公文

惟景泰六年某月某日孫男潛聞大父之計於金臺
寓舍不勝摧傷之至謹爲位會哭薦以酒殽而告以
文曰嗚乎昔哭大母今哭大父其間哭妻哭妹哭姑
不數載而遭喪者五也嗚乎天平何降謫之深而使
我居不能安食不能甘病不能愈也嗟唯大父在祿
而孤耿耿乎若向曙之星纍纍乎若幾絕之縷也比
長有知乃辛勤立門戶而備嘗艱阻也幸而既壓
復起者以氣節之奇志慮之大寔羣中之翹楚也始
貧而乏終富而餘以勤儉所積非暴橫所取也載餘
祠堂載修先塋而其餘力又營治乎屋宇也壺山之

陽桃溪之曲窅乎其幽深者棲遲之別墅也明月浮
波涼風入室灑乎其淒清者四時之儔侶也惟勢炎
炎人所趨而我所拒也惟貧無告人所棄而我所與
也積書以遺子孫而諄諄垂訓者惟恐爲人所笑侮
也操誠以待鄉隣而形於進止者無敢或愆於繩矩
也人皆謂天必佑善而若我大父者百歲可佇也奈
何壽止七十有四而歸骨肉於坏土也屬續之日間
里爲之罷歌而飢貧者自痛其失所也况潛爲孫尤
所教愛者當何如其嗟苦也嗚乎天平恩不能酬言
不能極徒南望號呼而揮涕之如雨也嗚乎哀哉嗚

乎哀哉尙饗

祭監察御史鍾同文

維天順六年歲次壬午五月某朔越二十又二日某
官某等謹以清酌庶羞之奠致祭于亡友監察御史
贈大理寺丞鍾君世京之靈曰嗚乎鍾君死於國
事久矣而人猶謂凜有生氣何哉蓋君之所學者博
而明所守者確而正遇事而發也浩乎不可劫奪方
建儲之疏上陳固已知逆鱗之難嬰矣雷霆之下難
於獨當顧惟正國本植綱常臣子分內事也而况
官以察爲名以言爲職於是而脂韋汨沒苟合偷生

人將號我爲無義氣丈夫內有愧心外有愧色將焉
用久存於世爲也古人有取日虞淵執言不屈卒而
下塞簾之拜大事以定而天下安意者忠以報國
誠以格天古之道或可行於今也夫何羣陰蔽塞天
意難回鳳縈麟囚窘辱萬狀而死隨之死固不足惜
國本未能正綱常未能植爲可惜也然君之孤忠
大節磊磊落落並日星而耀明後天地而銷歇視夫
未死而奄奄若九泉下人者大有間矣君平生廉慎
自持非義一無所取既死妻寡子幼貧不能自存人
皆謂君委骨於涼烟白草之中將終爲燕薊不祀之

鬼悲夫幸逢 聖天子復正大位舉顯忠遂良之典
贈君有窆秩袞君有美詞又錄其子將擢用之亦既
明君殉 國之忠矣及今子有成立間關數千里道
負骨南歸又有以全君首丘之義矣嗚乎君之死復
何憾哉某等辱爲同年愧不能從君以死其歸葬也
奠以卮酒侑以盞殮于以寓哀慕之忱謝不敏之咎
也嗚乎尙饗

祭柳東方先生文

維成化九年歲次癸巳三月辛卯朔越十又四日甲
辰詹事府少詹事兼翰林院學士門生柯潛謹以清

酌度羞之莫致祭于故行人司行人致仕方柳東先生之靈曰吁嗟先生吾儒之琛持行純正積學弘深進士高科其志攸遂官不滿德韜光早退芳林之下碧水之潛容止端莊冠裳委蛇求諸古人孰爲軌轍洛社高風香山偉節考德問業邦人偕來時雨所化罔不爲才至於遐方亦沾膏馥瞻仰斗山委心而服年餘八十進德彌隆俯仰無忤以壽考終屬續之時聞者洒涕謂茲哲人胡爲而逝如潛愚鄙受教良多幽明永訣悲痛奈何醜酒于觴登肉于俎薦此哀誠揮淚如雨嗚乎尚饗

祭封通政司叅議劉君文

士之木石與居者視天下之事漠然無所介於其胸
公雖自晦而篤於教子使出而用世也深懷猷畝之
忠士之幸被寵祿者自以爲得志而暴聲威以隆隆
公以子貴雖衣有章華養有厚祿也猶若寒素而謙
冲嗚乎觀公所以自處者質之古人盖同符而合軌
也使其食祿無窮益進於榮壽人將謂天之佑善昭
昭有如此也乃倏爾傾殂而官不公卿年不耄期是
何理也自公之喪聞者莫不歔歔况某等辱交令子
而傷悼之懷曷其能已有酒在觴有殮在篋跪陳辭

以告忱庶英靈其歆只

祭監察御史劉世亨文

代作

嗚乎世亨君果死兮寃君之心據君之事蓋有未可死者天何奪之遽也惟君器識之大資秉之強肆力問學其進曷量未可死也官居臺憲偉有殊調志所欲爲方試其兆未可死也家有慈母筋力衰邁老淚紛如忍割恩愛未可死也弄璋而毀楹蘭而萎身後寂寞竟無一兒未可死也嗚呼未可死而死君其瞑目於九原耶夫天之生人而不能事天者遽死可也力於事天昭昭不昧有如君者亦死何耶其有不能

事天而尊榮壽考雖至人不能及者抑又何耶嗚呼
君其瞑目於九原耶某等官忝同朝情深交契咎天
之昧茫悼君之早逝薄奠一觴以訣永世

祭赤石墓文

維天順二年歲次戊寅五月朔越十又一日某甲子
裔孫尚寶司少卿兼翰林院修撰潛謹以牲醴致祭
于四世祖某妣某氏五世祖某妣某氏之墓告以文
曰惟祖宗之積德流慶澤之悠長自五季以迄今衍
孫子其彌昌登華躋要雖晨星之落落佩仁服義藹
絃誦之洋洋潛以菲陋之質幸承世德之芳攀龍鱗

而附鳳翼登金馬而步玉堂勉忠孝之兩盡期於先
爲有光歲丁丑之秋暮奉 恩命以歸鄉惟報本而
追遠耿于中其不忘瞻赤石之佳兆爲先世之所藏
載登邱阜載雉榛荒儼神靈兮如在揮涕泗兮徬徨
酌一觴以薦誠冀垂佑於無疆尙饗

哀辭

涵江林穆軒哀辭

穆軒林君紹冉爲邑庠生才學方著而沒君子其
惜之既三十年其子公望來遊都下介其族弟鄉
貢進士崇罷持貴州按察使洋城林先輩所撰墓

銘過予求爲哀辭予既憫君賢而弗壽又重公望能孝慕其親也輒不辭爲書之如此

福唐縣尉孝行不置永錫其類些迨于穆軒實惟雲孫質粹而溫些敏而嗜學從于先覺嶄嶄頭角些肆爲文章江河湯湯觀者揄揚些執經庠序其學益裕燁有令譽些行亦無愆孝友兩全父母安焉些族人鄉比兼盡恩義靡有乖戾些人皆曰嗟是惟國華宜大以遐些登仕有日遽淪于疾永歸玄室些蒼天不傭降此鞠凶隣爲輟春些冥鴻在渚方將遐舉孰折其羽些騏驥之良方將服襄厥足用傷些嗟彼凶逆

乃壽而逸理焉可詰些惟嗇其身載豐後人有子振
振些予仰休德竟爾弗覲寧不愴惻些

倪汝敬哀辭

汝敬倪君舉進士爲監察御史倔強有大節景泰
間以直諫斥嶺南孤身遠寓推困幾不可生不悔
也比荷 聖皇賜環之恩遽以病卒予走吊之悽
惋累日猶不能釋故作詞如此

嗟君之才兮海湧川盈嗟君之烈兮電掣雷轟嗟君
之志兮星輝日明嗟君之操兮玉潔冰清悃悃兮大
廷之誨亶亶兮臺中之評謂尸祿兮可恥何逆鱗兮

難嬰下霄漢兮馳驅嶺海謝鷓鴣兮委命鯤鯨抱金石之粹兮遭烈焰而愈固標松柏之節兮飽風霜而益貞幸 聖明之復辟兮搜遺才於荒遠遂離幽以依光兮叩閭闔而輸誠方將昌厥施兮昭勲猷於宇宙豈期二豎之爲怪兮竟弗起於九京雖修短之有數兮何怨何戚顧有母之衰暮兮寧不鍾情嗚乎天兮何冥冥嗚乎天兮何冥冥諄曰荃蕪消歇兮灌莽敷榮鳳麟遠逝兮颺颺嗥鳴遡悲風兮咽無聲招君不來兮我心怆怆

封孺人楊氏哀辭

悲流歲之倏忽兮灑零露以瀼瀼嗟背護之頽謝兮
慨於邑而無芳閔閨闈兮憐慄掩帷箔兮空涼維媵
德之貞順兮宜壽考而不亾胡爲罹此殃戾兮汨長
夜之茫茫遣巫陽而筮予兮恐離散而或後也乃不
招於四方兮竟澌盡其莫救也豈騫翔以上遊兮邈
瑤池之無路也將搖佩於湘臯兮凜風濤而非所處
也嗚呼已矣兮軋予心而弗瘳將鑿椒以爲糗兮掇
蘋芳以薦羞載竚貽其莫及兮渺巴雲之悠悠增惆
悵而慘悽兮潛泫涕之如流諄曰蒼茫無端兮孰從
而歎仁必遐齡兮胡不我亶顧哀榮之兩全兮世不

多有嗚乎全生而全歸兮夫復何咎

書

復潘太守書

近蒙遣白衣遠貺果物感與愧并承手帖論伐樹一事反覆玩之蓋深有未合於理者夫爲理係於一心而已使心之明雖處與窳之地而邪正得失洞察其微况一樹之蔽耶心苟蔽矣雖履萬仞之臺亦何能有所見耶一樹之去留固於府治無所損益而足下惑術家之說決意去之是豈知爲政之大體哉足下廣人也廣有貪泉隱之奮而飲之卒以廉稱此足下

素所稔聞者何不效隱之故事術者曰去之我必曰
留之使人知政之通塞無預於樹足下之賢追古人
過今人遠矣僕向時語告足下欲留之者蓋以此樹
爲先輩林環侍講所植侍講博學有大名後人思之
見其樹猶侍講之存足下於此固宜益加培植以起
昔人見賢思齊之心乃反爲術家所惑竊謂於足下
不取也足下又謂府治爲一郡生民休戚所係學會
不過爲一邑育賢之地此又失輕重倒持之柄也邑
雖隸於府而教則先於政爲政而後教化欲民之去
戚就休萬無此理故文翁治蜀首務興學一事史載

之至今傳誦不忘足下篤學志於古者也志於古而
乃行今人事其可乎哉僕又聞足下近日飯僧供佛
以求福田利益此固吾儒所羞道者而足下乃躬爲
之究其爲盛治之累與伐樹均也故併告之先儒有
曰居是邦不非其大夫僕固不能逃避此律然郡守
之勢重在他人有欲言而不敢言者僕僭恃同年之
愛故敢言他人之所欲言倘以爲不悖而嘉納之則
治化之行可翹足俟矣履端不獲奉觴惟祝早膺
召命未間更乞爲時自玉不宣

雜著

題李太僕詠梅詩卷

梅峰李公 朝退之暇詠梅花律詩百首用馮學士
韻絕詩百首用馮學士題發乎情根極乎理駸駸乎
風雅門堂蓋達而工非窮也莆近時多作家人人完
長卿之高壘鼓秦系之偏師出奇角勝未聞有摧阻
而退降者公坐觀於旁養奇蓄銳欲然若無能一旦
馳赤電舞豪曹衝突於羣雄之伍而偃旗棄甲敗北
者多矣雖然莆一隅耳詎知天下無敵手乎公試揚
麾挑戰以觀其勇怯如何潛當策駑駘揮寸刃爲公
之偏裨也

題王孟端畫山水

王君孟端爲中書舍人以書爲職又能畫山水竹石與書俱精四方之人求其畫者足相躡於其門而君負絕筆非清流不與則在當時得之者已少况於今耶予每恨不獲見君觀此畫林巒水石皆極清絕則其中之所存可知也嘗聞君於月夜聞鄰有簫聲心甚適翼旦呼其人貽以畫竹一幅其人奉金爲酬君怒曰我固以爲清者而乃鄙俗若是索畫毀之昔聞本立以文學進身卒蒙畫師之恥若君者其可以畫師辱之哉

硯銘

剛其德也方其質也寧剛方以異不勝觥以隨我其
監汝蚤夜以思直焉惟汝知之枉焉惟汝規之然則
汝寔爲我之畏友何但策勛於塲屋效事於文辭耶

竹巖集補遺

詩

贈浙江徐童子

名霖五六歲精於書法
因贈以詩 出郡誌

徐家之子真奇絕風骨自與凡人別神駒矯矯步天衢
雛鳳翩翩出丹穴前身可是張文舒不然年纔五六
那能書當筵握筆不停手驚風颯颯蛟龍走掃盡
鸞箋三百張鐵畫銀鈎大如斗君不見東隣老翁生
一子癡絕無才事統綺從來紙筆不相親見此奇才
應愧死

此詩集中失載屠長卿能誦之
云兒時唐荆川嘗書此與之也

遊囊山寺

出郡誌

借榻雲深處風窻夜不扃興來吟弄月睡起坐聽經
鶴舞松陰碎龍歸雨氣腥明朝賦歸去山色爲誰青

重遊芝山

出郡誌

眼底皆親舊相邀訪白雲好山看不了名酒飲都醺
晴旭移花影輕鷗護水紋莫談塵世事詩思正續紛

策

廷試策

皇帝制曰朕惟自古王天下之要有三曰道曰德曰功然道莫如伏羲神農黃帝德莫如堯舜功莫如禹湯文武此數聖人者萬世仰之不能易也伏羲神農黃帝之事著於易堯舜禹湯文武之迹存乎書其所以爲道爲德爲功者朕欲究其心術之精微其推以治教養天下所尚雖殊然不出乎耕桑貢賦學校禮樂征伐刑辟之外朕欲參其制作之會通夫無所酌於古將何以準於今朕承祖宗大位夙夜惓惓於心

亦惟以古聖人之道德功自期以今天下之治教養
自勵茲欲盡驅天下游談之情以事耕桑使各衣食
其力盡約天下浮冗之征以歸貢賦使各膏肥其體
而無或失所養盡導天下狼戾之頑以從學校使各
復還其善盡陶天下粗鄙之陋以由禮樂使各移易
其俗而無或違於教盡作天下慵怯之兵以奮征伐
使各消阻其亮盡化天下爭鬪之訟以遠刑辟使各
崇尚其耻而無或外於治當何施而可也施之有效
民得治教養矣於古聖人之道德功可庶幾乎伏羲
神農黃帝曰皇堯舜曰帝禹湯文武曰王其稱號之

所以異者果道德功之所致乎抑治教養有隆替而然乎聖人之所以爲聖人一而已矣何皇降而帝帝降而王乎茲欲措天下於隆古之世使皇帝王之稱惟一而無隆殺之別亦必有其道乎子大夫習之於師而得之於已宜無不悉其說者矣既承有司賓興而來其具爲陳之朕將親覽焉

臣聞天下之事莫不有其本亦莫不有其要蓋先明諸心則事得其本遠稽諸古則事得其要聖人之治天下固莫不稽諸古以爲之要而亦曷嘗不明諸心以爲之本乎本諸心以治民而政化隆本諸心以教

民而民性復本諸心以養民而民生遂故曰心也者
萬化之原萬事之本伏羲神農黃帝堯舜禹湯文武
之所以爲道德功者固不外乎此心後世之所以法
古爲治者亦不外乎此心孟子所謂先聖後聖其揆
一也董子所謂正一心以正朝廷正朝廷以正百官
正百官以正萬民者此之謂也欽惟 皇帝陛下稟
聰明睿知之資備聖神文武之德居五位之尊以績
承列聖妙一心之用以中興家邦溷車書文軌於八
紘來玉帛冠裳於萬國治化可謂極其盛功業可謂
極其隆矣然猶不自滿假復進臣等於廷降賜清問

欲遠求皇帝王道德功之懿以大施今天下治教養
之仁臣有以知 陛下之心其即大舜好問好察文
王望道未見之心真欲聽而行之非以布衣微陋不
足以與天下之計姑以此試之也臣敢不精白一心
以對揚 陛下之明命乎謹因 聖策所及而條陳
之自古王天下之要有三曰道曰德曰功所謂道莫
如伏羲神農黃帝德莫如堯舜功莫如禹湯文武者
非謂皇有是道而帝王莫能與帝有是德而皇王莫
之及王有是功而皇帝莫與並蓋皇帝王隨遇而施
其所宜非謂長於此而不足於彼也夫三皇之世其

民皞皞其俗熙熙雖無二帝之孝弟以導之而民自無不親不遜之患雖無三王之征伐以救之而民自無塗泥炭火之虞其所急者在於道焉者也民未知所以養伏羲始結網罟以教佃漁神農始爲耒耜以教耕耨教民日中爲市交易而退黃帝則通其變使民不倦神而化之使民宜之於是民始得其所養所謂道莫如三皇者此也其事之著於易者如此迨夫堯舜之世開物成務之道已大備弔民伐罪之功無所施其所急者在於德焉蓋民既得其所養而巧僞日生不可逸居無教觀其克明峻德慎徽五典而帥

天下以仁百姓不親五品不遜而敷五教在寬於是民始得由其教所謂德莫如堯舜者此也三代之時承伏羲神農黃帝之統紹堯舜允執厥中之傳其所急者獨不在於功乎蓋洪水爲害於先桀紂爲虐於後聖人不得不任其責觀其修和府事而致萬世永賴之休取彼克殘而收四海永清之效於是民始得安於治又非所謂功莫如禹湯文武乎此其跡之存於書者又如此觀于易書則數聖人所以爲道爲德爲功無非隨遇而施其所宜然究其心術之精微欲以治教養於天下則一而已矣勢有不同故道德功

之施先後異宜理無或殊宜治教養之方古今一致
是故耕桑貢賦養之所由出學校禮樂教之所由興
征伐刑辟治之所由舉此古聖人已行之迹萬世之
所不能外者也 陛下嗣登大寶夙夜惓惓于心以
古聖人之道德功自期以今天下之治教養自勵此
所謂有志者事竟成也臣雖愚昧豈敢不罄一得之
愚以爲海嶽涓埃之助 陛下誠欲盡驅天下游談
之情以事耕桑使各衣食其力盡約天下浮冗之征
以歸貢賦使各膏肥其體臣願 陛下心古聖人之
心制其田里教之樹畜俾人人有常生之產而禁不

耕而食不蠶而衣之徒則國無游民而生之者衆矣
制節謹度輕徭薄賦俾四方咸惟正之供而凡所用
者有養所養者有用則朝無倖位而食之者寡矣如
是人皆得以衣食其力膏肥其體而失所養者無有
也誠欲盡導天下狼戾之頑以從學校使各復還其
善盡陶天下粗鄙之陋以由禮樂使各移易其俗臣
願 陛下心古聖人之心大興學校慎選模範躬行
道德以先之使爲師者知所以教弟子知所以學而
時無不可化之人崇重衣冠敦尚廉耻修禮樂以導
之使人皆知禮義之可貴鄙陋之可賤而世無不可

變之風如是人皆得以復還其善移易其俗而違於
殺者無有也誠欲盡作天下慵怯之兵以奮征伐使
各消沮其克盡化天下爭鬪之訟以遠刑辟使各崇
尚其耻臣願陛下亦惟以古聖人之心爲心結之
以深恩厚德使人之於見危也知有其國而不知有
其身臨之以信賞必罰使人之於赴鬪也至死不變
而臨難無苟免上有効死之士斯下無反側之心矣
道民以政不若道之以德使知入則孝出則弟下不
敢犯上卑不敢踰尊齊民以刑不若齊之以禮使知
少事長賤事貴耕者必讓畔行者必讓路下無爭鬪

之訟斯上有可措之刑矣如是人皆得以消沮其克
崇尚其耻而豈有外於治者哉夫治教養之方臣所
陳於前者 陛下不用則已用則必臻其效既臻其
效則於伏羲神農黃帝堯舜禹湯文武之道德功業
不可企及之有哉在力行之何如耳伏羲神農黃帝
開物成務以道導天下者莫大故稱曰皇堯舜漸仁
摩義以德宰天下者莫先故稱曰帝禹湯文武吊民
伐罪以功濟天下者莫急故稱曰王曰皇曰帝曰王
其稱號雖殊而其心則一曰道曰德曰功其事業雖
一而其勢則殊故世之有皇帝王伯猶歲之有春夏

秋冬非勢使之然乎 陛下誠欲措天下於隆古之
世使皇帝王之稱惟一而無隆殺之別臣則以爲惟
當明諸心而已心同則無所往而不同矣蓋以是心
而治民則征伐有道刑辟惟中即詩所謂王猷允塞
易所謂明慎用刑是也以是心而教民則學校振舉
禮樂興行即朱子所謂建學立師以培其根周子所
謂陰陽理而后和是也以是心而養民則農桑之務
舉厚斂之患無即詩所謂星言夙駕稅于桑田書所
謂財賦底慎庶土交正是也臣願 陛下始終此心
則始終此治始終此教而始終此養矣矧 聖朝

太祖高皇帝

太宗文皇帝勤是心以圖治於先

仁宗昭皇帝

宣宗章皇帝勤是心以繼續於後

太上皇帝承之神此心於清穆之上

陛下嗣而守

之運此心於九五之尊遠而祖述於前古近而憲章

於 祖宗登用賢才密勿廊廟制作禮樂統和天人

復隆古之盛治恢中興之大功伏羲神農黃帝堯舜

禹湯文武安得專其美於前哉此固

陛下已自勵

於心者臣應有司賓興而來幸得立玉階尺寸地安

敢不罄平日習之於師而得之於已者懇懇焉爲

陛下重言之乎若夫阿意以求恩逢迎以徼寵則非

臣之所學亦非 陛下求言之本意也伏惟 陛下
俯垂睿覽臣干冒 天威不勝怖懼之至臣謹對
表

及第謝恩表

伏以稽古右文喜值豐亨之運設科取士欲求疏遠
之才自前代以來惟我朝爲盛布帛菽粟渾然三代
之遺月露風雲陋矣六朝之體蓋必先擇之有司夫
然後獻之 天子是惟 聖祖敷求之意至于 文
孫恪守而行禮意加隆人文益著如臣等性殊朴魯
學本空疎呻吟咕嗶之間以歲以月遊息範圍之內

如天如淵久蒙作養之恩並預甄收之數食芹而美
雖懷一獻之素心采葑不遺遽辱九重之清問榮
隨寵至感與愧齊茲蓋伏遇皇帝陛下稟上知之
資居大君之位唐堯之德化不識而不知虞舜之聰
明好問而好察遇大有作爲之主行無所忌諱之時
爰題金榜之名載錫瓊林之宴維其偕矣方正席以
捫心何以予之忽在筭而披體皆不求而至其何德
以當臣等一飯不忘豈獨報以國士寸心自誓庶無
忝于賢科再期聖德之益崇永保天休之滋至
臣無任忻忭踴躍之至

引

族譜引

吾柯之譜其來久矣重修於國初外翰叔敬公至永吉公又續修茲且百年其責在潛顧日夜思維以家乘與國史同潛藉吾祖宗善慶忝職史官每與二三元老嚴實纂紀而家乘寧異是哉序不失倫實不溢美上光祖宗下示來裔所繫詎不重歟環聚吾莆者業已具藁第析派分支邇在隣郡遠居遐方皆由一脉而分須緣派廣求編註入譜昔人所謂不至相視如路人也且潛意出家爲僧者不錄以其自絕於

祖宗也于憲發遣者不錄以其自棄於祖宗也爲他人後因冒其姓者不錄以其自外於祖宗也此爲信譜始可以傳永久而無弊且欲得瓊山邱先生序弁諸首簡容領日並所著藁奉吾宗諸老長叅詳裁定

竹巖集附錄

中順大夫詹事府少詹事兼翰林院學士竹巖
柯公行狀 翰林院脩撰門生吳希賢撰

公諱潛字孟時別號竹巖行四姓柯氏先世石晉時
大理評事公寶自泉之晉江遷莆田武盛里生宋戶
部員外郎峽戶部生進士長陽尉濟長陽生潮陽令
瘠令之孫贈承事郎昱遷本邑安樂里族日以盛其
所居山至今號爲柯山承事生海豐令新之海豐令
生海陽尉留由海陽至公之父原村九世皆不仕公
生有異質周歲家人示晬盤一無所顧惟取書展玩

久之若有所悟者祖父異之曰是兒必以文學大吾
門十歲就外傳喜賦詩十五能爲舉子文時林知縣
廷芳方行人解二人以葩經名郡中公從之遊能盡
得其奧旨正統癸亥徵補邑庠生明年甲子領福建
鄉薦當赴禮闈以未忍離親弗果行戊辰試春官弗
第爲國子生景泰辛未 廷試第一甲第一人授翰
林院修撰公丰神秀穎資性持重言笑不苟其所與
遊必斯文雅誼至傾倒無間非其類雖達官要人氣
酸薰灼遇之不交一語當是時翰林諸老多爲之引
譽自是凡 朝廷有選任有制作公皆與焉壬申四

月陞右春坊右中允兼修撰五月預修歷代君鑒癸酉書成 賜白金文綺甲戌會試爲同考官是歲五月預修地理志書三載秩滿進階承德郎封父原朴如其官母戴氏爲安人贈封其配戴氏繼室俞氏皆安人丙子五月陞司經局洗馬仍兼修撰七月 命往應天考試舟經淮揚士有暮夜投公鬻私者公叱之曰爾急去毋自速罪戾其人謂公陽却之固以請以所賂遺公前公怒命執之付有司治以法是秋塲屋肅然錄成稱得人爲天下先還 朝乞 恩歸省未行 英廟復辟改元天順更授公尚寶司少卿兼

職如故仍許歸省戊寅十月還京己卯二月奉旨
修玉牒庚辰命偕呂學士原考禮部會試十二月
命克東宮講讀官進階奉直大夫加封父中允公
奉直大夫尙寶司少卿兼翰林院修撰壬午呂學士
卒英廟御文華顧謂內閣臣李賢曰呂原卒內閣
密命之地今翰林院文學之臣誰可嗣其任者賢首
薦公曰具官臣柯潛清德粹文於今罕儷上然之
已而弗果用癸未二月復命偕陳學士文考會試
未竟會場火而罷甲申今上即位以侍從恩陞
翰林院學士三月有旨選進士十八人李東陽等

入翰林爲庶吉士 命公教以古文詞學希賢不肖
預執業焉八月 上御經筵 勅公兼經筵官九月
奉 旨纂修 英廟實錄成化改元八月壬考順天
鄉試九月玉牒成 賜白金文綺丙戌 殿試與讀
卷是月再奉 旨教庶吉士林瀚等二十四人十月
賜新刊貞觀政要一帙十二月 詔吏部臣簡文
學之臣堪入內閣掌密命者數人以聞吏部王尚書
翔復首薦公又不果用時 命掌翰林公維持公正
人心帖服八月進英廟實錄陞詹事府少詹事兼翰
林院學士十月 賜大明一統志戊子二月侍經筵

講讀時禮部左侍郎虛位吏部臣疏乞以今閣老督
山萬先生及公克之二人皆極翰林一時之選且意
階是可獲大用名既上公復不果用七月 詔下議

慈懿太后山陵事公率僚屬上章論合葬於禮爲
宜詞甚剴切既而文武羣臣又合詞上請 制可之

十二月 賜經筵儒臣七人襲衣冠履時公已聞少
卿公喪卽其家 賜之既而有司爲少卿公請祭公
陳情且乞營葬或謂公乞葬於禮非宜公曰人子患
不能厚葬其親吾盡吾心而已得請與否非所較也
幸而獲請雖死且不朽 上念公經筵勞併與之葬

蓋異數也公受 恩感激銜哀就道抵家擇葬地于
祖居東一里許和溫山公既奉几筵第圖繪形式付
其弟通州學正江董成之時母太宜人在堂庚寅正
月太宜人屬疾卒 朝廷遣官諭祭辛卯四月有
詔起復時祭酒員缺久難其人 上知公剛方將用
之公聞 命具疏辭乞終制大畧言奪情非令典忠
君者必自孝始未有不能盡孝於家而能盡忠於國
者也 上覽疏許之初公素無疾至是以久寢苦塊
患左足風痺比免喪久之猶未平而寒疾繼作矣公
自必不起呼學正君與之訣而逝時癸巳年八月十

八日也距其生永樂癸卯十二月初六日年五十一
娶戴氏先卒繼娶俞氏前南京禮部侍郎綱之女側
室王氏子一宗文王氏出公早有二子皆不育洎宗
文生適吏部薦公入閣弗獲 命學士永新劉先生
戲謂公曰入閣與有子孰多公笑而弗答女二長適
饒州府學鄭教授之子邑庠生叔寬次亦天俱戴出
俞宜人有賢行事舅姑內外無間言撫宗文如已出
公身後可無憾矣公平生負直氣操行介特發而爲
文峻整有法類其爲人尤長吟咏興至舉筆立就清
新微婉綽有風致所著有竹巖稿若干卷性尤喜遊

供職之暇借諸知已窮覽勝概雅歌投壺分韻賦詩
襟度豁如也既綜院事修飾公宇卽詞林後圃結清
風亭鑿池蒔蓮決渠引泉公退宴坐其中又翛然若
眞登瀛洲者至於遇事感發言論侃侃揚權古今毅
然自負噫如公者可謂動靜不違守之以正者矣故
雖官庶僚已繫天下之望位日通顯望日隆重雖嘗
以聖賢之學經濟之謀啟沃 聖心而未見柄用夫
用不用非所以論公也公孝友天性愛二弟撫育從
子始終無間因念季弟之早亾也悉以先公所構寢
室讓與其子宗璧而自與學正君別作室于都廳之

東西以儉約自居而其睦族人也尤篤恩意先是族有戊瞿塘者父子相繼死溺一子清尚幼未有知識公聞之惻然亟取以來以長以教洎有立始遣歸其行義大都如此公之卒也巡撫福建都御史江浦張公以聞宗文遂以其年月日葬公先期遣人走京師乞銘表於當朝鉅公謂希賢故門生宜有述希賢愚不肖聞公將北上方以晨夕得親炙爲慶奚忍遽聞其計而與之永訣耶又奚忍執筆而爲之論撰耶雖然師生義重不可終辭敬錄公履歷之大者如右庶立言君子有所採擇云

故詹事府少詹事兼翰林院學士柯公墓誌銘
賜進士資善大夫禮部尚書兼翰林院學士知制誥
經筵官晉山萬安撰

公姓柯其先泉之晉江鉅家石晉時大理評事寶始
徙莆田之武盛里寶五傳至宋丞事郎昱又徙安樂
里昱九傳至君實君實生德平德平生原樸公之曾
大父大父也原樸娶戴氏生三子長即公次江又
次澍公自幼警敏嗜學十歲喜賦詩十五能爲舉子
業時已巋然出朋輩矣其祖父喜曰是兒後必以文
學光吾門從同邑知縣林庭芳行人方澥受經悉得

其底裏正統甲子領福建鄉薦戊辰會試中乙榜得
校官力辭入太學與海內士相切劘無虛日景泰辛
未會試中第十二廷試第一擢翰林修撰聲名遂聞
天下公入翰林喜從諸老游益自淬礪學與行日有
進諸老亦器重之每爲之引譽壬申春選任東宮
官陞右春坊中允仍兼修撰癸酉修歷代君鑒成受
賜資陞司經局洗馬仍兼修撰是秋考應天鄉試天
順丁丑授尚寶司少卿兼職如故公恒以久曠定省
爲念至是乞歸展覲明年還京又明年考禮部會試

未幾簡克 東宮講讀官甲申 今上嗣位以待從
恩陞翰林院學士授奉政大夫詔庶吉士李東陽等
十八人俾進所業 上初御經筵勅兼經筵官賜銀
幣織金襲衣文綺成化乙酉考應天鄉試尋以脩玉
牒成賜宴文華門兼賜銀幣文綺丙戌克廷試讀卷
官復 命教庶吉士林瀚等二十四人是冬以內閣
缺員 詔銓曹簡文學之臣二三人以聞而尚書鹽
山王公九臯首以公薦不果用乃命掌翰林院事丁
亥與修 英廟寔錄成陞詹事府少詹事仍兼學士
賜宴禮部兼賜銀幣襲衣文綺是冬造禮部左侍郎

缺員銓曹薦公補之又不用戊子 特命日侍經

筵會有 詔議 慈懿皇太后山陵事時內閣首據

禮以合葬言公繼率僚屬上章極論宜合葬已而文

武臣工亦合辭爲請 上御便殿召諭而從之冬初

賜講臣冠服于經幄是時公聞父喪解官遣使卽其

家予之有司援例爲其父請祭公乃懇乞營葬 上

念公年勞併與之蓋異數也公感恩銜哀卽日奔程

既襄事晨昏詣几筵奠哭已乃侍母宜人問安視膳

以養日嚴踰年母宜人繼卒踊哭幾絕有司以聞

上遣官諭祭辛卯 詔公起復爲祭酒具疏力求終

制辭甚懇切 上覽而允之公因遭連喪寢苦塊患
左足風痺久未平一日寒疾作度不能起亟召江屬
以後事語畢而逝實癸巳歲八月十八日也巡撫都
御史張公瑄以聞 上嗟悼久之命禮部諭祭工部
營葬域一時卿大夫莫不哀而惜之素相厚者又發
之詩歌以泄其思嗚呼公存心也端而厚持身也廉
而介發爲文章峻整有法度詩詞清婉有風致初在
考應天鄉試過淮暮夜有投公鬻私者卽執付有司
俾繩以法自是人莫敢干以私其握院章事鉅細惟
公是處僚屬至今稱頌之其教吉士日抗顏課程之

賴以成才者凡幾輩及修史則紀述詳而予奪當其
侍經筵則以道德仁義陳說仰期啟沃 聖衷公歷
仕雖久然恒以文學在侍從故見于職業者若此使
天假以年則 朝廷必有大付託公亦必有大樹立
而今已矣卿大夫所以哀而惜之夫豈矯情也哉公
天性孝友事親始終有聞友昆弟少長一致澆病躬
爲視湯藥比卒殯葬悉從厚又將先公所築室讓其
子宗璧而與江別構一室以居族人有遠戍瞿塘者
溺死遺子清孱弱無芘依亟携取而教育之稍有立
始遣歸及見困於貧乏阨於患難者往拯卹之惟恐

不逮其見于行義者又若此凡卿大夫哀而惜之又豈矯情也哉公生于永樂癸卯十二月六日諱潛字孟時別號竹巖所著詩文若干卷亦因以名篇享年五十有一嘗荷 恩累封父奉直大夫尚寶司少卿兼翰林院修撰母爲宜人而其配戴繼室俞亦累贈封宜人子一日宗文副室王出女一戴出邑庠生鄭叔寬其婿也宗文卜以卒之明年十二月十五日葬公于安樂里和溫山之原乃具公履歷之緊遣人詣京往請修撰吳希賢爲狀徵余銘墓石余念與公居翰林餘二十年纂修接席進講則連裾同被 命陞

學士陞詹事而內閣禮部之舉又皆與公同則知公之悉者莫余若也今公之葬非余銘誰銘而余銘之亦豈矯情也哉銘曰

蓄德以爲車兮秉文以爲旛駕飛黃棲迹于玉除兮方矚望爲邦家之基展所蘊以弘濟乎海隅奈倏變于天衢兮俾人懷耿耿而徒日傷吁

成化甲午夏六月望日

祭文

門生李東陽撰

維年月日門生翰林院修撰吳希賢編修謝鐸焦芳
陳音倪岳李東陽檢討傅瀚張泰謹以香帛牲醴之
儀再拜遙祭于 詹事府少詹事兼翰林院學士竹
巖柯先生之靈曰國必有老成繫天下之輕重世必
有公論別天下之浮沉然老成不在年位之高而在
才德之稱公論不恃衆人之口而恃士大夫之心故
見李司隸者傾龍門之高見韓荊州者失侯封之貴
見歐陽內翰者嘆宮闕之壯華山之峻河水之深而
况托師生之分聆道德之音者乎此愚於公所以憤

懣抑鬱而涕淚沾襟也當夫名冠甲第詞雄玉堂愚於此時固已識公之文章秉章縮鑰衡度精確愚於此時固已窺公之才畧山靜川澄冰清玉瑩杜荀直之門辭起復之命愚於此時則又見公之德行若是者非愚之私也蓋天下之所知而公論之所歸也故金滕石室之秘人莫不以爲宜絲綸臺閣之選人莫不以爲遺及其降司成之召也方藉以爲重而憂哀累歲徘徊而未至也皆憾以爲遲遽謂公一蹶而至于斯也嗚乎悲夫泰山之高瞻者不知其爲勞梁木之壞造物者不自以爲悔此人情之所同而天道

之不可賴也千里之辭一觴之酌又豈特區區門墻之愛而已哉

像贊

從吾彭 韶題

高材遠韻清標粹學掄魁之中嶄然頭角玉堂賓詹歛博施約四海望之北斗喬嶽若究其用庶興禮樂

梁溪勝會詩序

門生陳 音題

竹巖柯先生起 殿魁累官至詹事府少詹事兼翰林院學士平生仗大節不少貶以徇時其與人處和厚怡愉未嘗以賢貴自遠其從父文魁有別墅在壺山之南旁有溪曰大梁水來自山中縈石澄澈溪上

佳木蒼鬱魚鳥相忘於指顧間先生愛其清絕嘗合
宗姻朋舊十餘人遊賞於其間投磯而坐命童子傾
壺效昔人曲水流觴之趣飲微醺各揮毫爲詩凡若
千什題曰梁溪勝會文魁公愛而藏之頃其子在德
携至京因其從兄大理寺副在亨君請予序于首簡
于時先生沒已三年矣嗟夫浮生易度盛會難逢方
梁溪之遊人未知此會之難得也先生既沒而此會
不可再矣自古山溪清致如蘭亭東山赤壁之類皆
因名人以有聞于後梁溪得先生一遊爲之品題以
增重于世幸矣諸君子得與先生徘徊觴詠以盡一

時之樂又得以其所作詩章附之是卷以傳獨非幸歟先生所志遠大未嘗以文士自名然弼中自彪於外詩文筆翰清新高古出於天趣之自然不假敦琢而成蓋號文士者所不能追文魁君得藏于家以爲其子孫傳世之寶其幸又何如音始從先生遊瞻仰道德之暇心亦慕其文詞以爲徐求而得之未晚也不意先生沒雖欲其隻字不可復得則覽此卷得不自鳴其不幸歟雖然此予之私也先生之沒天下以爲不幸者豈以其文之得與不得哉

遊文嶺巖詩稿跋

門生吳希賢題

竹巖柯先生以文章雄一世曩在翰林嘗奉 上命

以文事教希賢輩庶吉士十八人希賢愚不肖先生
不鄙所以相汲引甚至先生爲人風度凝遠胸次灑
落故發之詩篇率清新俊邁如登千仞之崗天風颯
至爽氣襲人而此二章乃遊文峰所作時先生約王
君原雍偕行王君以事弗克赴既歸錄以示一時登
覽之勝字畫高古實先生所自書先生於人少許可
獨雅厚王君亦斯文之情味有同焉者詩之錄夫豈
虛辱乎哉王君求識一言希賢獨念先生負天下之
望進不得爲伊爲周道業以弘詎意別去數載九京

不可作矣觀此會令人徒抱無涯之悲嗚乎其無涯
之悲也夫

竹巖集續補遺

詩

遊梁溪

濟濟羣英集相歡話故情雲連山一色人與景俱清
新雨收炎熱涼風解宿醒倦來猶不寐坐聽石泉聲

石牛山

怪石巉巖狀似牛不知一睡幾千秋蒼苔發背疑毛
長細雨微沾恍汗流野草縱生難下口蒲鞭亂打不
回頭欲尋鼻孔無穿處天地爲欄夜不收

及第賜宴詩

瓊林宴罷醉陶陶，笑坐金鞍意氣豪。
自喜真龍千載遇，須談汗馬一身勞。
杏花風暖香吹帽，楊柳烟濃綠映袍。
一派笙歌歸去路，無人不到讀書高。

送翁世用赴貴州叅議 清江翁君世用赴貴

州叅議予既爲文送之而又重以詩者感平
昔愛厚故不覺詞之多也第愧以瓦石混珠
玉囊中壓損奚奴希君勿以爲怪

綠楊高館畫橋東，駐馬銜杯醉臉紅。
湛湛闕下絲絲遠，道萬山中客懷休訝。
山原異奪俗須教，禮樂同想見。
塞帷行部處，棠陰滿地動春風。

題樂義樓二首

古來佳致說蘭亭誰識壺南水更清欲使山中添故事石崖高處醉題名

其二

捐困捐廩事堪誇到處人傳尚義家褒詔一函頒鳳闕壺南山水倍光華

序

壺山翠峰精舍圖序

莆之中有壺山屹立乎穹壤之間高出乎培塿之上一方之巨鎮也山之陽延袤數里乃翠峰之東坡土

壤饒沃樹木繁翳山之餘氣所鍾也輪鞅不入塵囂
不到通州大都不相隣偉乎棲遁之所也於此不之
居將焉居乎伯永余先生篤學清脩隱而不仕嘗拓
其地別構數椽其制維度其飾維素匪斲匪雕爰蔽
風雨雖未免爲世之務華靡者笑而實爲識者之所
取蓋由其性之簡朴心之閒靜而然也故夫百工之
役於藝有不暇爲焉商賈之趨於利有不屑爲焉有
宅一區植花竹以自娛有田數畝力稼穡以代食或
投竿而漁於溪或執衽而採於山無非各適其趣而
已暇則開南軒面壺山澹之爲烟霞清之爲水月無

窮之佳致舉集目前於焉氣以爽而神以清體以舒而情以暢怡怡焉愉愉焉有不知戶庭之外而吹人野馬之茫如也予聞而異之曰隱者乎棄珠玉於錙銖視軒冕如泥塗安於逸而不欲勞適於靜而不欲擾甘於澹泊而漠然與世無求豈其心之所以自處者然乎抑亦時勢使之然乎方今 聖明之時樂畝畝者茅茹而征遯巖穴者聆望而出而先生獨且棲遲於衡門之下優游於田里之間蓋其身之所自處然也委之時勢則非也先儒所謂一世之高士微斯人其孰與歸今者往矣其子木石君嘗求山水圖一

幅裝潢成軸題曰壺山翠峰精舍豈非心乃翁之心
而用彰厥美於不忘乎一日介於賓月宗伯以文屬
予夫隱之道遠引物外與予之志雖不同也然隱而
克善其身亦不害其爲隱也不可以不嘉遂書以貽
之復直蹶然而爲之歌曰

壺山之阿兮維翁之居茅茨不剪兮甕牖繩樞逕不
通人兮庭不容車有田可畊兮有畦可蔬一瓢自足
兮於心澹如葛衣綦巾兮優游里閭名有不之慕兮
利有不之趨載擊缶以歌兮而永矢弗渝既非放曠
之士兮亦非趕趕之夫殆所謂不戚戚於貧賤不汲

波於富貴兮鴻荒太古氏之民歟

邑乘藝文志載竹巖公文集五十卷希齋公校訂
時僅得十八卷豈誠如礪峰康公所云鳳凰芝草
以少爲瑞乎惜遭兵燹並十八卷原板無復存者
先子愧季府君有志議刻每嘆獨力難支庚戌歲
偕族子當塗令愚三捐刻大宗族譜續又校刊竹
巖公文集並創建官祠奈事甫竣而愚三逝矣越
數年先子亦下世茲奉 部檄內開續修文獻通
考館徵求各直省名賢文集竹巖公與焉余小子
竊喜先德之表揚有自因再以所見詩數首序一

篇並附於後非敢曰續前人所未講亦庶幾無負
先子與愚三之志云爾外尚有勉學子文一篇四
讀書歌並四時主雲飛調各四章詩中傳誦甚多
今因訛重訛莫辨故不敢槩登諸版

七世從孫邑庠生應元謹識

三

世多稱吾家學士公之文尙矣先考暨兩先兄皆嘗
議刻宦所竟中輟者以稿多逸且訛未遑定也維騏
自乙酉告歸耕釣之暇訪諸文獻舊族采諸宇內圖
志叅諸從祖蒿齋君所手錄讎校編次凡十八卷自
媿三十年臥家食貧曷由畢先志哉甲寅夏后峰董
大夫索覽是集曰景慕素心表章亦吾任也遽召匠
給之直刻于烏山草堂以便覆校顧其費頗鉅不敢
重溷有司乃貽書留曹姪本兼諭從弟凌霄共成之
嗚呼公去今八十年文章始克流布設程公篁墩在

豈僅一記入文衡耶或謂公在當時耻以文士自名
奚計身後之傳與否然因文考世忠孝介直之懿在
焉爲子孫者庸忍弗傳乎且其語學必曰明道語仕
必曰勵節公寧不欲永傳之爲子孫訓乎董大夫之
倡茲舉崇賢也亦勸孝也是可以知政矣

嘉靖乙卯春仲之望

賜進士出身南京戶部主事四世從孫維騏百拜謹
識

潮少時聞 諸祖竹巖公一二軼事心竊異之當上元夜里有陳姓者仰見空中火燭熒煌一人袍笏於馬上諦視之公也是歲公遂以進士及第第一人逮騎箕之辰有石匠遇公于壺山驕從甚盛公命匠至其家取直至則屬績數日矣蓋公爲崧高降神巋然負命世之望匪厖厖掇取科第以爲榮也公在翰苑日手植二栢于堂後久而蔥鬱李長沙課庶常以學士栢命題復自行長歌一篇館閣諸公爭屬和之輯成卷帙以詒公之子俾藏于家長沙故嘗與十八人同承詔受業于公者感公汲引之深故爲詩以識不

忘而薦紳大夫讀公之詩若文莫不欣歎想見其人
前民部希齋公距公八十年所矣蒐羅散失補正闕
譌離爲十八卷版行于世其用力既勤且久惜遭兵
燹燬燼不存曩潮承乏于湖將購求元本重付開雕
而簿領填委未之逮也比謝政旋里從藏書家獲見
副墨亟借鈔以歸兼叅之近時族人所錄詳加讐勘
弄之篋行因念公之文章流播遠邇非可祕爲一家
之私更閱歲時互相傳寫不無烏焉亥豕之虞而海
內欣嘆欲觀之情亦莫由克慰夫孰尸其咎耶爰謀
諸族長者文學愧季翁各捐若干金鳩工鋟梓并附

行狀志銘祭文於後族中同志咸謂是盛舉也相與
踴躍從事自惟謏劣不足以窺公之深顧公之精神
歷劫不朽其所撰述雖經蟲蝕紙敝兵戈水火之餘
決不遂令湮沒此潮所爲知公而無疑者旣竣事敬
綴數言於卷末後之君子追思公之文采風流而恨
不生其時循覽是集庶亦可以得其概已雍正癸丑
壯月之吉族孫潮百拜手謹書